

ISLAM I MUSLIMANI U JAPANU

Japanci su prve informacije o islamu dobili od svojih susjeda Kineza. Prije 123 godine Japan je posjetio bojni brod Osmanske Imperije. Taj brod je doživio havariju u blizini japanske obale. Preživjele mornare u Tursku je vratio japanski brod. Japanski mornari sa spomenutog broda po prvi puta su se susreli sa islamom. Istanbulske džamije očarale su Japance što će kasnije imati presudnu ulogu u nastojanjima da upoznaju novu vjeru o kojoj su vrlo malo znali.

Japan je ubrzo nakon toga otvorio diplomatsko predstavništvo u Istanbulu. Nakon Istabula Japan je otvorio predstavništvo i u Džeddi proširivši tako odnose s islamskim svijetom. Kada je Japan zaratio s Rusijom odnosi ove zemlje s islamskim svijetom su se proširili. Prvi musliman dolazi u zemlju izlazećega sunca iz Rusije po imenu Abdur-Rešid Ibrahim, koga su ruske vlasti prognale iz zemlje zbog njegovih političkih aktivnosti protiv carske vlasti. Bio je po nacionalnosti Tatar što još jednom potvrđuje da je ovaj narod bio u potpunosti opredijeljen za islam.

Abdur-Rešid je bio prijatelj japanskog generala Akašija koji mu je pomogao da dobije azil 1327. Hidžretske (1909). Abdur-Rešid je bio vrsni islamski misionar koji je uspio prevesti na islam brojne Japance, a među njima Kotaro i Yamaoka. Obadvojica su obavili hadž 1909. godine. Abdur-Rešid je umro 1946. godine. Godine 1924. u zemlju stiže islamski misionar koga su komunističke vlasti Turkmenistana protjerale iz zemlje, po imenu Muhammed Abdul Hajj Kurban. Nakon njega u Japan dolazi još 600 izbjeglica iz Turkestana koji bježe pred komunističkim vlastima.

Muhammed Kurban osniva u Tokiju prvi mesdžid 1938. godine. Nakon toga on osniva takozvanu *Kur'ansku medresu*. Krajem Drugog svjetskog rata Muhammed Kurban je zarobljen od strane Rusa i poslan u Sibiriju gdje je umro 1952. godine.

Nakon Drugog svjetskog rata broj Japanaca koji su prihvaćali islam naglo se povećao. Brojni japanski vojnici koji su u Drugom svjetskom ratu ratovali u muslimanskim zemljama prihvaćali su islam u kome su prepoznavali duhovnu snagu koja će ih duhovno i moralno ojačati pred brojnim problemima razrušene zemlje. Među tim vojnicima koji su prihvatili islam u

Maleziji treba svakako spomenuti Omera Bukinu i Omera Mitana koji je prihvatio islam u za vrijeme rata u Kini. On je 1960. godine osnovao Islamsku zajednicu. Kada je Kinom zavladao komunistički režim jedan broj kineskih muslimana napušta zemlju pred progonom i seli u Japan. Od 1956 godine u Japan počinju dolaziti islamski misionari koji postižu krupne rezultate jer dobar broj Japanaca prihvata islam.



Hadži Omer Yamamoto prvi japanski musliman
koji je obavio hadž

Većina misionara je dolazila iz Indije i Pakistana. Kada se islam dovoljno učvrstio na japanskom tlu i Japanci su počeli davati svoj obol širenju vjere. Među njima najpoznatiji je bio liječnik Ševki Futaki koji je osnovao posebnu islamsku bolnicu. Zahvaljujući njemu tisuće Japanaca su prihvatili islam. Po ugledu na Ševkija u središtu Tokija otvorena je nova bolnica u kojoj su bili liječnici muslimani. Izgradnju bolnice pomogla je

poznata islamska humanitarna organizacija Džem'ijje teavunijje islamije. Kada je na islam prešao poznati vlasnik najveće japanske klaonice, muslimani su dobili priliku jesti halal hranu koje do tada nisu imali.

Pretpostavlja se da dana u Japanu ima oko 400.000 muslimana, a s obzirom da japanski Ustav osigurava pravo svakom Japancu da izabere religiju kojoj će pripadati, broj pripadnika islama je u stalnom porastu. Muslimani su koncentrirani u Tokiju, Kinsaju, Osaki, Kobeu, Kitu, Nadžuji, Hirošimi, Sindyayu i Šizuki.

Brojni su mesdžidi u Japanu, a najpoznatiji je svakako onaj u Tokiju koga je izgradio Muhammed Kurban 1957. godine.



Džamija u glavnom japanskom gradu Tokiju koga je izgradio Muhammed Kurban 1957 god.

Prvi prijevod Kur'ana na japanski jezik objavljen je 1920 godine, a drugi 1973 godine. Obadva prijevoda su prenijeti s engleskog, a ne arapskog jezika.

Islamski vjeronauk za djecu održava se po mesdžidima, a naročito u Tokiju, Osaki i Kobeu. U Japanu nema ni jedne islamske škole koja bi školovala imame i vjeroučitelje, međutim islamske zemlje, a posebno Saudi Arabija, svake godine stavlja muslimanima Japana stotinjak stipendija da izučavaju islam na njenim sveučilištima. Nedavno je Saudi Arabija financijski i kadrovski pomogla osnivanje srednje vjerske škole i dječijeg predškolskog centra u Tokiju.

Ni u Japanu kao ni u drugim zapadnim zemljama ne postoji jedna jedinstvena Islamska zajednica u kojoj bi svi muslimani bili ujedinjeni. U Japanu djeluju uglavnom četiri islamske zajednice koje za razliku od zapadnih zemalja nisu podijeljene po etničkoj pripadnosti nego po mezhepskoj. Većina imama i vjeroučitelja u Japanu su stranci, a samo jedna trećina su Japanci. Pisac ovog prikaza studirao je sa nekoliko Japanaca u Libiji. Pretpostavlja se da danas ima preko 200 studenata Japanaca koji studiraju na brojnim islamskim sveučilištima.



Džamija u Kobeu



Islamski centar u Tokiju



Mesdžid u gradu Fukuoka na otoku Kyushu na kome živi oko tisuću muslimana



Grupa muslimana u mesdžidu u Osaki



Šejh Ibrahim Sawada, imam u Islamskom centru u Tokiju